

Fieste de Patrie: Vît capitâl dal Friûl par une di

Tantis lis autoritâts intervignudis e i temis frontâts
par celebrâ la edizion numar 45

La 45^e edizion de Fieste de Patrie dal Friûl e je stade realizade tal Friûl di soreli a mont, in comun di Vît. Nol è dome il lûc là che al viveve il zovin che Ugo Foscolo al à cjàpât tant che ispirazion pal so Jacopo Ortis, ma soredut un teritori cenglât di bielece, fra boscs incontaminâts e aghis limpiis, espression di trop che il Friûl al sedi ancjemò une tiere dute di esplorâ. Inmaneade dal Comun di Vît, cu la poie de Regjon Autonome Friûl - Vignesie Julie e de ARLeF, in colaborazion cul Istitût Ladin Furlan "Pre Checo Placerean", la manifestazion e je stade ancje la ocasion par un anuzi impuartant: dopo di San Michêl dal Tiliment, Tei e Cint, ancje altris trê Comuns dal Venit - Puart, Gruâr e Fossalte - a àn fat domande par jentrâ in maniere uficiâl fra i Comuns dal ambit furlanofon tutelâts de leç 482 dal 1999 su la tutele des minorancis linguistichis storichis. La comunicazion e je stade fate a sorprese di Gianluca Falcomer, sindic di Cint.

La zornade e je tacade cu la esposizion de bandiere dal Friûl sul monument ai Muarts in vuere di Vît, un moment di solenitât compagnât dal côr di Fors Davôtri. Po dopo, te glesie parochiâl di Vît e je stade dite Messe in lenghe furlane, cun leturis e preieris ancje par sloven e par todesc; infin al è stât il moment pe esibizion de orchestre di zovins Sante Margarite di Anduins.

A misdì, tal centri polifunzionâl di Cjasiât, là che si son cjatâts i cicloturiscj de FIAB regjonâl partîts di Codroip, e je duncje scomençade la cerimonie civîl, vierte cu la leture de bole dal imperadôr Indri IV. Po dopo, Pietro Fontanini - tant che sindic dal Comun di Udin, che l'an passât al à ospitât la Fieste - al à consegnade la bandiere dal Friûl al prin citadin di Vît, **Pietro Gerometta**, che cul so intervent, tal ringraziâ ducj i presints e lis autoritâts, nol à platade la sodisfazion di podê dâi acet ae manifestazion: *«Cuant che la ARLeF e à proponût a cheste Aministrazion di organizâ la Fieste, o sin stâts pardabon braurôs di podê celebrâ la furlanetât te nestre valade cun ducj voaltris. Nô Furlans "di ca da la aga" o puartin une plaie dal 1968 incà, cuant che nus àn "sparfîts". Une sielte che e à lassât la sensazion garbe che il Friûl si fermàs su la rive a çampe dal Tiliment. Il popul furlan al è fuart intai valôrs ancje se debil tai numars e, vuê plui che mai, no podin permetisi divisions. Intune societât cetant globalizade, che dispès e puarte a nivelâ e a uniformâ i valôrs viers il bas, scancelant lis specialitâts e lis aspirazions dai popui, o vin di jessi un riferiment salt tal tignî di cont e tal trasmeti i valôrs antîcs, adatantju a une societât une vore tecnologjiche e informatizade, par dâ ai nestris zovins lis rispuestis justis che si spietin. Par chest, o soi convint che il dovê de nestre gjenerazion, la nestre ereditât pal avignî, e sedi la responsabilitât di trasmeti i valôrs e i principis de nestre furlanetât aes*

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

gnovis gjenerazions, come che i nestris paris a àn fat cun nô. E je tes nestris lidrîs che o podìn cjatâ il spirt e la credibilitât che nus fasaran prontâ la strade pal doman».

De impuartance di tutelâ la furlanetât e i furlans al à fevelât ancje il president de ARLeF, **Eros Cisilino**: «*O sin chi vuê par celebrâ la Patrie, il Friûl, a 945 agns che e je stade istituide: no je duncje ocasion plui juste di cheste par meti l'acent su la tutele des lenghis locâls ma ancje des identitâts. Il fat di dâ a chescj ambits i juscj ricognossiments, come pûr une rapresentance che e promovî in maniere efficace la tutele dai dirits e lis azions concretis par podêju meti in vore, al è un teme di dibatiment corint, massime in ambit european. La lenghe e je fate par cognossi e par dialogâ cul nestri interlocutôr, e e je duncje il miôr strument par ogni risolucion: invistî intal confront dialetic al vûl dî invistî su la colaborazion e su la pâs. Inte nestre regjon, che e rapresente un vêr unicum european, stant che ca a convivin cuatri lenghis, al è un grant impegn in chest sens, testemoneât dal resint "Plan gjenerâl di politiche linguistiche pe lenghe furlane"».*

Geremia Gomboso, president dal Istitût Ladin Furlan "Pre Checo Placerean", al à marcade la necessitât di insegnâ la storie dal teritori a scuele: «*Se vuê o sin culî a celebrâ la Fieste, al è merit di centenârs di furlans, vuidâts di cuatri oms: Tiziano Tessitori e so fi Agostino, Pier Paolo Pasolini e Pre Bepo Marchet. Chê volte, nissun al sperave intune regjon autonome: il Friûl al varès vût di jessi provincie dal Venit. Ma di ogni cjanton dal Friûl, fin a Puart, i furlans a àn fat propuestis pe lôr future regjon. Agostino Tessitori lis à racueltis, prontant une sintesi che po dopo e je stade presentade dal pari, intun document, ae Costituente. Un fat che nol è avonde cognossût, massime des zovinis gjenerazions. Une mancjance che la scuele e podarès comedâ se dome i programs a previodessin, cemût che o stimi necessari, un percors dedicât ancje ae storie dal Friûl, il teritori là che i nestris zovins a cressin e che a cognossin masse pôc. Chê de nestre Tiere e je une storie siore e e mostre cemût che il Friûl al sedi stât precursôr in tancj setôrs: fra i prins parlaments in Europe, cuntune Costituzione che e previodeve la partecipazion no dome de nobiltât, ma ancje dal clericât e des comunitâts».*

Ringraciant pal grant lavôr fat de ARLeF, che e rapresente il braç operatîf de Regjon, l'assessôr aes autonomiis locâls **Pierpaolo Roberti** al à precisât: «*Cu la aprovazion dal Plan gjenerâl di politiche linguistiche e je stade fate une svolte che e permetarà di promovî e di slargjâ la difusion de lenghe furlane intun teritori che al lee la sô specialitât ancje ae presince di diviers idiomis. In chest sens a van interpretâts ancje i stanziaments al Teatri Stabil Furlan che al rapresente un tassel bande la divulgazion de lenghe; a chescj si zonte chel de sô promozion tai mieçs di comunicazion. Cun di plui, intal ambit dal concet di autonomie, intindût tant che guvier dal teritori intal mût plui util pe proprie comunitât, al va metût dentri ancje un spazi plui grant destinât al furlan intes scuclis. La cumbinazion di ducj chescj elements e permet duncje di inçressi la difusion de lenghe e di sfantâ il pericol di une sô marginalizazion o ancjemò di plui de sô sparizion di un teritori che al à fondade la sô autonomie su chescj concets».*

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Il president dal Consei regjonâl F-VJ, Piero Mauro Zanin, che nol à podût jessi presint, al à inviât ae Aministrazion un salût, cu la sperance che di Vît al puedi partî un messaç di pâs.

Finide la cerimonie civîl, lis autoritâts intervignudis – i conseîrs regjonâi Giampaolo Bidoli e Massimo Moretuzzo; i presidents de Assemblee de Comunitât Linguistiche Furlane, Markus Maurmair, de Confederazion des Organizacions Slovenis, Walter Bandelj, e de SKGZ pe provincie di Udin, Antonio Banchig; il vicesindic di Pordenon, Emanuele Loperfido; il president dal Teatri Stabil Furlan, Lorenzo Zanon; in plui dai rapresentants dal Uffici scolastic regjonâl, Paola Cencini, de Universitât dal Friûl, Enrico Peterlunger, e di Ente Friuli nel Mondo, Gabrio Piemonte, Vieri Dei Rossi de Societât Filologjiche Furlane, insiemi cul diretôr de ARLeF, William Cisilino – a àn podût assisti in anteprime ae proiezion de gnove version, in clâf moderne, dal Imni dal Friûl “Incuintri al doman”. Un progjet realizât dal Istitût Ladin Furlan “Pre Checo Placerean”, in colaborazion cu la ARLeF. Tal filmât, tant che suaze de interpretazion musicâl dal grup “Moments” – di une idee di Moreno Valentinuzzi –, il regjist Giorgio Milocco al à sielzût viodudis maraveosis dal Biotop naturâl des Risultivis di Flambri e dal Mulin Braida, il lûc là che fruts, cu lis lôr bicicletis, a son daûr a cirî un tesaur.

Nol è stât l’unic video dedicât a cheste zornade: ai 30 di Març, di fat, sul canâl YouTube YOUpaLTUBO – progjet inviât de ARLeF tai mês passâts e realizât dai zovins pai lôr coetanis – e je stade publicade une gnove clip cun protagonist l’istrionic Federico Benedet. Cu la sô ande ironiche e soradine, intun pâr di minûts, il fantat di Manià al fâs un “piçul ripàs di storie” sui fats che a àn puartât ae nassite de Patrie.

Il program, par cure dal Eco Museu Lis Aganis, al è lât indenant ancje tal dopomisdì, dopo dal gustâ tradizional, ufrint ai presints la pussibilitât di visitâ la mont di Anduins, là che al è il monument ae Mari dal Friûl; il cjistiel Ceconi, a Pielunc; lis grotis di Pradis; la Plêf di Sant Martin; e la antighe biblioteche storiche di bonsignôr Zannier, là che pe ocasion al è stât presentât il libri di Walter Tomada “Storia del Friuli e dei Friulani”.

Udin, ai 3 di Avrîl dal 2022

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<